

Komunikadu Imprensa
19 Juñu 2020

JSMP husu ba membru deputadu sira atu respeita Konstituisaun no lei sira bainhira hala'o sira-nia knaar iha Parlamentu Nasional

Iha 17 Juñu 2020, Parlamentu Nasional konvoka reuniaun plenaria hodi husu justifikasi saun husi Ministru Finansa kona-ba proposta alterasaun ba Lei Nú. 14/2009 kona-ba Estatutu Remuneratória ba Titulár Kargu Polítika.

Iha diskusaun ne'e, mosu desentendimentu entre membru deputadu balun relasiona ho utilizasaun língua ofisiál Portugés iha intervensaun deputadu sira-nian. Membru deputadu ne'ebé la simu argumenta katak deputadu sira tenke halo intervensaun iha Tetun tanba ema barak mak la kumpriende Portugés.

Situasaun desentendimentu ne'e sai grave liutan bainhira membru deputadu ne'ebé la simu ho uza língua Portugés ne'e hasai liafuan ofensivu "Xina pirata" ba membru deputadu ne'ebé ko'alía Portugés. Aleinde hasai liafuan ofensivu, membru deputadu sira ne'e mós envolve iha agresaun fízika iha plenaria laran.

"Ita nia Konstituisaun RDTL bandu ema atu halo diskriminasaun ba ema seluk bazeia rasa, kór, étnia, língua, nsst. Aleinde ne'e, Rejimentu Parlamentu rasik mós dehan katak bainhira membru deputadu ida uza liafuan ne'ebé la di'ak, injurioza no ofensiva ba morál no mós bainhira hasai liafuan insulta ka ameasa ba integridade fízika deputadu seluk nian, deputadu refere lakon ona direitu atu ko'alía. Tanba ne'e, JSMP husu atu membru deputadu sira respeitu Konstituisaun no lei sira bainhira hala'o sira-nia knaar iha Parlamentu Nasional," dehan Diretora Ezekutiva JSMP, Ana Paula Marçal.

Artigu 16 Konsituisaun RDTL kona-ba universalidade no igualdade

1. Sidadaun hotu-hotu hanesan iha lei nia oin, no mós iha direitu no obrigasaun hanesan.
2. Labele halo diskriminasaun ba ema ida tanba nia kulit, nia rasa, nia estadu sivil, nia seksu, orijen étniku, nia lian, pozisaun sosiál eh ekonómiku, hanoin político ka ideolojia, religião, instrusaun eh nia kondisaun fízika eh mentál.

Rejimentu Parlamentu Nasionál Artigu 65 husi Lei Nú. 15/2009 kona-ba uzu indevidu ba liafuan iha pontu 1):

- e) Uza liafuan ne'ebé la próprio, insulta ka ofensivu ba morál;
- f) Halo insulta no ameasa ba integridade física ka moral husi kualkér deputadu.

JSMP mós observa katak atitude membru deputadu sira ne'e, aleinde la tuir saida mak konsagra iha Konstituisaun no lei, atitude sira ne'e mós la tuir lisan no kultra Timor nian kona-ba respeitu malu no hatudu imajen ne'ebé la di'ak ba povu Timor iha partikulár no iha komunidade internasional iha jerál. Atitude ne'e mós hakanek ona dignidade Parlamentu Nasionál hanesan órgaun soberanu ida ne'ebé reprezenta povu tomak tanba hahalok sira ne'e la konstitui valór étika. Nune'e, espera katak membru deputadu sira labele repete hahalok ne'ebé hanesan iha futuru.

Atu hetan informasaun liutan favór kontaktu direitamente:

Ana Paula Marçal
Diretora Ezekutivu JSMP
Telefone: 77040735/3323883
E-mail: info@jsmp.tl
www.jsmp.tl